

Piero Vis'ciada

Foglio de curiosità e notizie della comunità paesana. Stampado in proprio e distribuido a caso. Chi che vol scrivi (a gratis) e i altri, se ghe par, che i legi pur (a sbaf).

...e ti col MUS



...e mi col BUS !



Piemonte d' Istria 10 settembre 2006:
"Quassù vignivo col mus, mai gaveria pensà de vigni col...bus !"

IMPRESA STORICA:

Chi , sessanta anni fa,
 poteva immaginar che
 gavessimo festeggiado la
 Madonna Picola andando
 sul montisel col bus !

Ma, chi oggi pol
 immaginar che tra
 sessanta anni.....

Madona Picola, festa che come za osservado l'ano scorso da sto foglio iera orm ai al capolinea per noi piemontesi. Sia de quà che de là ormai l'ombra dele grandi feste del passato. Ma za l'anno scorso gavemo provado a combinar qualcosa e sto anno proseguendo su sta linea de recupero e in un clima forse un poco troppo scettico semo rivadi a far anche qualcosa de più. Qualchidun, ma per la verità no dela nostra comunità, ga storto anche el muso per via che ste feste le femo "fora", là a Piemonte.

Ma noi, la "nostra" festa ne piassi farla nel "nostro" paese, la ga tuto un altro gusto, xe tuta un'altra aria. Noi ne piassi star in prima linea, a testimoniar che esistemo e che, forse a differenza de altri, se gavemo inacorto che i tempi (e la gente) cambia. Rispetemo le idee de tuti per via che semo consapevoli che tute le singole storie del esodo xe stade differenti, quella istriana da quella dalmata ma anche in Istria da paese a paese.

A Piemonte xe ndai via tuti e a chi che ne domanda qual che xe el nostro rapporto coi rimasti semo in imbarazo a risponder. Quai rimasti !? Iera quatro de lori e desso ghe ne xe do, e anche quei -veci parenti o veci amici- ne xe difficile cosiderarli "quei altri". Fatalmente, in sesanta anni, la siora cola falze - "A Livella" come ghe diseva el napoletano Totò- ga livelà in maniera impressionante, squasi come el tempo ga fato co le nostre case.

Dal 1940 a oggi solo luti, tragedie, abbandoni, separazioni, confini, dolor, silenzi, odi, incomprensioni e case crolade. Per Piemonte sesanta anni in cui la storia xe tornada indrio de seicento. Anzi, pezo, con tuto de ricostruir, tuto de inventar de novo, basti dir che no esisti nianche un gabineto per el pelegrin o pel viandante mentre che 600 ani fa ghe iera fin el terzo prete.

Cosa dovessimo far !? Morir esuli !? Lasar che vadi tuto in remengo !? Che i se cusini nel suo brodo !? Che xe quel che i ga voludo !? Che basta che a noi i ne daghi ste quatro lirete svalutate !? Gavemo de star quà -da Piemontesi in esilio ma liquidadi dai nostri toscani come "emigranti in zerca de lavor"- a spetar che i fazi el Zavrseje Rural Vilage !? A brontolar come quatro veci insempiadi !?

Cossa far allora !? Ormai da tempo, da "acuti osservatori", gavemo notado che pasando el confin, che anzi xe diventai do ma diventerà tra poco denovo un solo (mamamia come che cambia ah le robe !) no se vedi più la miliza, i ga cavà la stela rossa e anzi anche i festegia el fato de aver, lori stessi, ciapado a piade la Jugo e tuto el baracon federativo. Per le tergovine -come per le konobe- no ghe xe più el facion del maresciallo. Cossa xe nato !? Come mai sto cambiamento !? Come mai sto ripensamento !?

Restemo cauti e guardinghi ma se interrogemo se anche noi gavemo per forza de restar immobili come 60 anni fa o se almeno un minimo gavemo de rinfrescar el nostro guardaroba, anche solo che no i ne ciapi pel fioco con demmo in giro per strada.

De sicuro visto che a suo tempo i ne ga cavado tuto e -quel che xe giusto xe giusto- su i nostri diritti no esisti mediazioni. De sicuro el dolor che ne xe sta provocado xe intiero nel nostro cuor e no xe goma che lo cancelli ma de sicuro tra noi e el nostro Piemonte no ghe xe più le torete dei graniciari, no ghe xe le imboscate dele guardie popolari, de sicuro no ghe xe più "quei" partigiani che desso anche Mesic (presidente croato) ammetti -, magari dopo 60 anni- gaveva superado ogni ragionevole e umano limite nela loro azione "liberatoria".

60 anni fa, in piena tragedia, senza speranza e cola rassegnazion al pezo iera qualchidun che poteva immaginar quel che oggi xe la normale realtà !? Dovemo restar rassegnadi a spetar quele quatro fliche !? No ne ga insegnado niente la storia !? Nè nel (tanto) mal come nel (magari poco) de ben !?

60 e più anni fa, sul montisel sora de Piemonte, no iera agriturismo e se poteva andar su per stretti sentierini solo che col mus. Ma anche el montisel ga visto passar i anni e un de quei sentierini xe diventà un fià più largo, no tanto, magari no asfaltado ma quel tanto che basta per eser più agevole, per percorerlo con qualcosa de diverso, de più moderno.

60 e più anni fa i piemontesi festegiava la Madonna Picola in duomo tuti insieme e i vigniva zo anche dai vilagi intorno e iera "festa granda". Sto anno -denovo e de più- i piemontesi se ga trovado in duomo tuti insieme per celebrar la patrona e dopo, chi che ga avudo voia ga fato "festa granda" in montisel con fusi, luganighe e fisarmonica balando e cantando.

Per andar fin lassù, però, visto che semo "acuti osservatori", no gavemo pensado più al mus ma a un più comodo e moderno pulman e qualchidun ga osservado: "Ara mi vignivo sempre quà su col musmai gaveria pensà in quella volta, de vignir su col bus !"

Forsi che la Madonna xe brava de far de sti miracoli, forse più ela che tanti altri Napolitani (più grigi e sicuramente più rossi de quel Totò) che va in zerca de longhi con riconciliazioni obbligatorie e imposte. Veci metodi predileti anche dall'allora (suo) compagno maresciallo. Veci metodi come el mus ! Poco adati, oggi, a menar tuti a far "festa granda".

El Nacolin

MADONA PICOLA

CONCERTO - MESSA CANTADA BATESIMO DEL SITO PRANZO CON MUSICA CANTI & BALLI GNANA ANA & BARBA BETO REGALI - SUSINI - MIEL E VIN..

Ore 09.30 partenza: qualche incertezza col posto de ritrovo e coi documenti, ma la gioiosa machina organizzatrice se meti in moto.

Pullman pien con alcuni posti riservadi per chi che xe za partido prima in bicicleta e tornerà indrio più comodamente insieme a noi. Ma oltre al pullman pien a Piemonte ne raggiungerà diverse macchine per quella che sarà una bela giornada de sol in compagnia.

Puntuali rivemo alle 11 a Piemonte e in paese trovemo ad accoglierne Oliviano Miani con el suo miel e i suoi prodotti molto aprezadi. Un grazie particolare anche per averne messo a disposizion i suoi servizi colmando cussi una lacuna che nel terzo milenio xe a dir poco imbarazante.

Come da programma alle 11.30, introdotto dalla presentazione de Piero Prato, inizia el concerto d'organo con brani de Vierling, Hendel e Mozart eseguidi dal giovanissimo a altrettanto valido Davide Circota.

Xe emozionante sentir le note del nostro vecio organo, vero gioiello d'arte organara -costruido dal Piaggia nel 1740- e attualmente el più vecio organo istrian funzionante sonado oltretuto da un nostro compaesan, che a sua volta xe el più giovane organista istrian.

Per una mezoreta, alternadi ai brani, xe sta modo anche de sentir alcuni cenni storici e tecnici sul organo riportado in vita dal maestro belga Patrick Collon e che ogi xe sistemado in una cesa che benchè più nova del organo la gaveria altrettanto bisogno de manutenzione.

La gente che ga impini la cesa, per questo che xe el primo concerto del piemontese Circota per noi compaesani, ga seguito con atenzion e alla fine oltre ai meritati e calorosi applausi per el "maestro" Davide xe rivado anche un giusto riconoscimento.

Da Trieste ghe gavemo portado due libri de musica organistica, un del grande Don Giuseppe Radole e un, autografado, del maestro della cappella civica de Trieste Marco Sofianopulo che, da noi incontrado, se ga dito disponibile per un appuntamento a S.Giusto con l'organo tergestin messo a disposizion del nostro "maestrin" piemontese.

Alle spale del organo per alternar i veci mantici se ga prodigado papà Gianni, mentre ale spale del organista trepidava mama Daniela, maestra del coro che ga acompagnado la messa cantada che a mezzogiorno xe stada celebrada dal paroco in onor dela Madona.

Alla Parrocchia la nostra comunità ga consegnado in questa ocasion le oferte che, ricavade dalle nostre elargizioni, xe stade raccolte nel 2005 per "contribuir" alle necessarie piccole manutenzioni dele cese o dei cimiteri del paese.



ore 11.30: Al organo più antico l'organista più zovine.



L'aria sufiada dai mantici se trasforma in musica



Sul sfondo anche la Madona Picola asiti al concerto.

L'ocasion de una foto de tuto el grupo fora dela cesa xe anche l'ocasion per "batezar" el sito dela nostra Comunità. Un parto difficile, ben oltre i nove mesi canonici (e ancora adesso che stemo scrivendo no gavemo la sodisfazione de vederlo on-line) che però segna un momento importante per noi piemontesi che metemo a disposizion dela "rete" la nostra storia e la nostra immagine.

Però ragionando per importanza storica, l'evento più importante dela giornata xe l'impresa assolutamente per noi mai sperimentada de raggiunger el Montisel a bordo del bus (e no col mus come una volta !). Aplauso da record per l'autista che ne ga menado squasi fin in tavola dove ne ga accolto e acompagnado per tuta la libagion la fisarmonica de Maurizio Brosolo.

Ma un plauso ghe va anche a tuto el "staff" del Montisel che ga rivado a contentar anche tuti quei che, numerosi, se ga zontado fin l'ultimo momento alla folta e alegra compagnia. Alla fine conteremo quasi un otantina de persone, de tute le età e, de tute le regioni (dala Sicilia, pasando per la Calabria fin su qua de noi al Istria). Una festa "nazional-pololare" insoma che ga coinvoltato un poco tuti quando xe saltade fora anche chitare e tamburei e "diverse" formazioni corali se ga improvvisado intorno ai musicanti.

Come per magia xe sparidi tuti i aciachi e i disturbi che nianche un secio de pirole a casa no rivassi a guarir. Passado el mal de schena, l'artite, l'artrosi e anche le palpitazioni i nevodi vardava atoniti le miracolate nonete balar come farfale e i omini inverigolarse in acuti e controcanti conapena "qualche" disonanza.

Miracoli dela festa, che fin le sie ne ga tignudo incolai sul montisel. Dopo, sempre col stesso "Aereo-bus" semo ateradi denovo in paese, dove nela vecia sala de balo, ne spetava tavoloni de vin e de susini che Pino ne gaveva preparà cola sua solita ospitalità.

Giusto una pausa prima de "ndarghe drio de Gnagna Ana e Barba Beto, che in S.Roco, soto la porta dove i sta da secoli i ne ga contà no solo la loro storia ma anche qualche altra curiosità del paese pasando su verso la cesa del Rosario per la strada alta.

Nel slargo dela cesa se ga avudo quindi ocasion de veder l'avanzamento dei lavori su quella che iera ciamada "la casa dei maestri" e che ormai ridota a un mucio de piere diventerà invece la casa parochiale.

Prima de rimontar in pulman per tornar casa ancora un brindisi che ne da l'ocasion per ricever, come Comunità, una bella pittura del amica e brava artista Alda Claretti e -dopo consulto su due pie del Comitato- de assegnarghe a Piero Prato (factotum non piemontese) el "Susin de Piemonte" investindolo cussi dela cittadinanza onoraria al merito, per tuta la sua disponibilità che el ga sempre dimostrà colaborando ale nostre tante attività.

Una de queste sarà quella de replicar e de migliorar quanto gavemo rivado a far per sta Madona anche nela prosima primavera per quel che sarà el cinquecentenario de S.Francesco.

Brentapiena

FESTA GRANDA

FIN L'ULTIMO NO IERA SICURO DE RIVAR A FAR UN PULMAN.
QUALCHIDUN ANCORA IN FERIE E ALTRI CHE, SENTINDESE ZA TROPO
VECI, DISEVA: "MA COSSA TE VOL CHE VEGNO, ME DIOL QUA'..ME DIOL
LA". MA LA CURA MONTISEL GA FATO MIRACOLI...



*Una fisarmonica,
un bon bicer de vin,
la compagnia giusta.
Come se fa a resister
ala tentazion de un valzerin !?
Altro che mal de schena !*

**10 SET.
2006**



*El menù del montisel:
persuto...formaio...
fusi...gnochi...
...tajadele...
...ombolo...luganighe
...patate...
...café...dolci...
adiritura crostoli..
Ma come digerir desso
tuta sta roba !?*



*Forsi allora con un altro giro de valzer !?
Mah, mejo de tuto, un giro..de trape !
"E..chi è nato in genaio si alzi ! Si alzi..
Chi è nato in genaio si alzi in piè !"*



*El più zovine dela compagnia:
Dala Calabria con simpatia.*

*"Alora, te sa quela !? Bon, vien drio..."
"Re, fa...sol... Alo !"... "La mula de-e Parensooooo...."*

*La compagnia più zovine:
Un benvenuto a Miriam !*

...E ANCHE DE PIU' !

Eh si, perchè nel pomeriggio tuti de novo in paese, chi per saludar parenti o amici, chi per far scorta de miel, vin o altri prodoti. In ogni caso l'apuntamento iera nela vecia sala de balo, dove Pino gaveva preprà guantiere de susini e ancora del bon vin per far un ultimo brindisi. Chi che gaveva ancora voia de far do passi se ga messo drio dei nostri "ciceroni" locali: gnagna Ana e barba Beto ga improvisado un giro turistico guidato per quele quatro pere de origine romana che ancora se pol veder a Piemonte a cominciar proprio da quel toco de basorilievo che li rafigura incastonadi proprio tacadi del stema dei Contarini.

Poveri, de quel tuti sa e tuti conta, de lori che xe sai più veci poco se sa e mai no se li ricorda e alora prometemo de dedicarghe un speciale del PieroVis'ciada.



10 sett. '06 -Piemonte d'Istria: Porta de S.Rocco - Foto con gnagna Ana e barba Beto, che smontai zo dal muro del castel, ne ga portà in giro per el paese contandone qualche curiosità su de lori e su altre pere de origine romana.



10 sett. '06 -Piemonte d'Istria: Nela vecia sala de balo l'amica pittrice Alda Claretti ga fato omaggio ala nostra comunità de un suo bel scorcio de Piemonte.

La sera, in sala, prima de far ritorno a casa, xe ancora el tempo per due bei momenti che ne ga regalado ancora emozioni. Quasi un "gemelagio" con Castagna (paese storicamente rivale del nostro) o comunque un segno de afeto de una castagnese che, nela persona del amica Alda, ne ga regalado una sua opera e ala fine un improvisado ma sentido riconoscimento a Piero (presentator, documentarista, un de quei-dela-fontana) insignido dela appartenenza onoraria ala nostra comunità.



10 sett. '06 -Piemonte d'Istria: El primo "Susin de Piemonte" al sempre disponibile Piero Prato.



10 sett. '06 -Piemonte d'Istria: Batesimo ufficiale del sito internet dela nostra comunità. Foto ricordo col nome del "dominio".



Per "motivi tecnici indipendenti dala nostra volontà" el sito no xe ancora on-line, ma semo drio risolverli, portè ancora un poco de pasiensa.